

գրաւելու համար , գաղթում են ամբողջ գիւղով և տիրում են հայերի կալուածներին , որ մինչեւ օրս կոչւում է Էրմանի մուլքլար (Հայի կալուածներ) : Ծերունիներն ասացին , որ յիշեալ գիւղը հնումը յայտնի էր իրենց պապերին Փիրի-Քեանդ (Սուրբի-Գիւղ անունով , և երբ գաղթում են այդ գիւղը , այլ եւս այդ անունը չեն տալիս , որովհետեւ եղած Հայերն իրենց գիւղին Մօլլա Խալիլ էին ասում :

«Ինչի՞ համար են Հայերը իրենց գիւղը Մօլլա Խալիլ կոչել , այդ մասին ոչինչ չասացին , ասելով , որ պատճառը իրենց յայտնի չէ :

«Մենք կարծում ենք , որ Մօլլա Խալիլ բառը դուրս է եկել Մօլլա-Խալիֆայ բառի աղաւաղումից :

«Հենց այս բօպէիս թուրքերը մեր եպիսկոպոսներին խալիֆայ անուն են տալիս : Թեմիս սրբազան Առաջնորդը , որ 1889 թուին՝ չրջել է այս տեղերը , տեղիս թուրքերին յայտնի է խալիֆայ անունով : Հետեւապէս Հայերը հնումը տեսնելով , որ թուրքերը չեն կամենում այդ սրբավայրը Հայի սուրբ անուանել քանի որ իրենցն են ընդունելիս եղել¹⁾ , բացատրել են նրանց սրբի ոմ լինելը , հասկացնելով , որ այդ գիւղը իրենց Մօլլա խալիֆայի նահատակութեան տեղն է , այդ պատճառով անուանիլ են գիւղը Մօլլա խալիֆայ , որ ժամանակի ընթացքում դարձել է Մօլլա Խալիֆ կամ Մօլլա Խալիլ :

«Ինչպէս ասացինք , Մօլլա Խալիլ գիւղից դուրս Վատնեան դաշտի արեւմտեան ծայրում , ձորակի ափին , գտնւում է սուրբ Գրիգորիոսի մատուռը : Հնումն ներկայ մատուռի տեղը եղել է քարակոյտ , որից յետոյ տեղական Հայերը շինել են տախտակեայ մատուռ : Մատուռի մէջ տեղում առաջուան քարակոյտի տեղը շինում են մի փոքրիկ գմբէթաձեւ շինութիւն , որը և եղել է Հայերի աղօթատեղին : Դիպուածով յանկարծ այրւում է այդ փայտեայ մատուռը , որ և վերջապէս շնորհիւ բարեպաշտ Տրկին եղիսարէթ Կաճկաճեանի հիմնաւորապէս վերանորոգվում է :

¹⁾ Հենց այժմ էլ շատ թուրքեր իրենցն են համարում այդ սուրբը , ուստի և հաւատում են , զոհաբերութիւն են անում :